

# 13 Makkár lea dálki otnne?



Lea sotnabeaivi. Biette lea ruovttus iežas lanjas. Son geahččá lássaráigge olggos. Olgun arvá. Giđđa lea boahtimin. Muohta lea masá suddan eret. Biette lea juo bargan leavssuid ja dál son lea joavdelas. Su mátketelefon čuodjá. Jovvna ringe.

*Jovvna:* Hei, dá lea Jovvna. Maid dál barggat?

*Biette:* Ii dál dás maidige.

*Jovvna:* Boađe deike! Boađe min geahčái!

*Biette:* In mun gal viša. Arvá.

*Jovvna:* Muhto dat ii daga maidige.

*Biette:* No mun boađán. Leahan goittotge liekkas, vaikke arvá ja lea obbadálki.

*Jovvna:* Na, farga gal firte.


*Biette:* Muhto galggan vuos borastit.

*Jovvna:* Galle áigge gearrgat vuolgit?

*Biette:* Diibmobeali geahčen.

*Jovvna:* Na buorre. Dat gal heive bures.

*Biette:* Mun sihkelasttán. Oaidnaletne farga.



Biette manná feaskáarii. Son váldá skáhpes jáhka ja coggá dan badjelii. Son nahkeha gápmagiid juolgái. Son lea iežas mielas gárvvis vuolgít go eadni maid bohtá feaskáarii.

Eadni: Gosa manat Biette?

Biette: Manan Jovvna lusa.

Eadni: Galggat borrat vuos. Vai juogo leat borran? It oaččo vuolgít, ovdalgo leat borastan.

Biette: Mun eske borren.

Eadni: Na buorre. Ja gárvot bures. Lea galbma bieggá.

Biette: Ii leat. Lea áibbas liegga dálki. Giđđabiegga dušše vehá bosoda. Gal mun birgen eadni.

Eadni: Muhto arvá. Ale njuoskat iežat. Ja cokka gahpira vel oaivái!

Biette: Juo, juo... Gal mun ieš dieđán.